

萬柳溪邊舊話

宋 知非子允 玘君玉撰

始遷祖贈待制公

諱叔保

自晉江避難入吳往來吳中諸

郡未有定處嘗同王樞密康靖公游浮玉山宿壯繆侯祠中以下居求夢夜夢侯手賜錫器器中書一成字覺以告康靖康靖曰器者器皿也皿上著一成字錫者常之西南有錫山神明賜公錫器意者俾公無錫而子孫盛乎始祖遂領神意定居錫之許舍山中命子孫世世奉壯繆侯香火

待制公徒手入吳以正直名世縉紳多厚遇之性最穎善書尤長方丈扁額字閒以繪畫自娛求者必厚價然後落筆故晚年頗雄於財園亭池館爲一時絕勝許舍山中祖基乃買江氏敞居而新之者也東偏楠廳三閒壯偉高敞玉蝶梅四十二樹環遶之待制公善書書環玉堂三字于梁閒後文獻公諱於紹聖元年畢漸榜登第四十二歲而入玉堂四十二樹之兆也

事詳君墓志中文獻公生宋神宗熙寧七年八月朔日

待制公嘗游福勝禪寺少飲卽醉午睡一竹榻旣覺有

長眉老僧坐其傍告公曰吾居鳳皇山禪定百年傳先師相氣之法見先生左鼻氣如松右鼻氣如雲此身後清貴永永留名子孫貴盛罕有其比但不及親見之耳相與結納而別後果如老僧之言今公不遷之祠扁雲松堂蓋自定也

許舍山多許氏有修吾先生精于禮樂文獻公師事之先生卽選爲長壻愛同諸子公後與修吾長子少卿公德之同年舉進士又與德之相繼拜司封郎中人以爲奇

許舍山深多虎童男女晝不敢出戶待制公憂之乃命  
蒼頭拾楝子數十斛預作大繩以楝子置繩股中埋  
于山之四圍不四五年楝樹長大如城圍山中人號  
爲棟城相與出貲造四門于四方曉開夜閉虎遂不  
敢逾城而入山中人德公世世尸祝之焉

關侯祠凡三易後定築于青楓巖下祠後潭水清澈可  
愛另立一方亭對潭扁曰雲留亭題兩邊柱曰山光  
悅鳥性潭影空人心皆待制公手筆待制公奉關侯  
如祖先朔望必拜餘日隔三五日必來灑掃虔捐培

灌竹木故竹木比他山麓更森蔚可愛春秋多遊人  
亦有進關侯香者待制公晚年畏寒慎于出戶已經  
一月不入祠一日微雪中肩輿而來以袖拂侯像之  
塵侯兩顴若有汗者待制公以爲灑掃之役誤以水  
及像乃手拭之既乾稍久復有心甚疑之不覺淚下  
速歸便臥疾一月而終正除夜也

上事閱譜  
載之更詳

待制公生二子皆洪夫人出也長有終公

諱大成

年二十

四而娶范貞節娶二年而舉子陽秋公

諱申

范貞節年

十九而有終公歿貞節水漿不入口哭泣二日懷陽

秋公付少姑徐氏曰姑無子以我子爲子可也徐將問故貞節持夫故佩劍自刎死有司如例給粟養陽

秋公而表其墓少姑待制公妾

有終公母弟無已公諱大生有俠氣鄰右許氏婦與人

私同謀殺夫里宰發其事有司不明置里宰罪公捐

數十金爲贖之一夕矚知許婦與私夫同處于樓公

素有勇力乃持刀躍入樓破其戶斬二人以出亡而

遇一僧持燈夜歸者稍識公公懼變服逃于蕩東西

僖里子文獻公借蘇州籍薦名淮漕不第復歸里中

明年州薦始登進士

陽秋公與從弟文獻公同年月生公長十日耳以母范

貞節死于劍戒家人不得殺牲人殺者亦不食人稱

爲清素道人終其身不忍服紵綺等衣從弟官日尊

得推恩歲以公名進公不應布素食淡自如年三十

而生子贈少帥公諱時遂與鄒夫人別居公一生未

嘗近二婦也鄒夫人年百有四歲而卒

贈少師公字逢盛號雲耕奉父母有曾參之譽承祖父

高貲喜任達傾財結客多樂與賢豪貴人游里有蕭

氏者先世皇胄富冠一郡放利行勢則有之未嘗爲盜也富爲眾怨一邑之人共指湖中爲盜一家六十餘人考掠成獄待死時文獻公官尊矣知其冤而不與白公乃傾家產爲蕭白之遂以勞瘁卒年四十有五室耿夫人一慟亦卒公與耿夫人同年同月生只不同日耳而卒則無不同人咸異之

文獻公二姊皆適葛氏兄弟也一子各生四男皆有文章盛名江左稱葛氏入麀勝仲次仲同登何昌言榜進士後文獻公一科耳師仲正仲繼之亦一時衣冠

之盛而其後舉者亦十餘人咸得外家之教

文獻公年二十一歲登哲宗紹聖元年進士以薦試學官高等除教授三轉至禮部員外郎權國子司業遷司封郎進太常卿兼諭德累除國子祭酒中書舍人給事中拜兵部尙書尋知樞密院除觀文殿大學士知建康府加少保致仕年八十五薨贈少師諡文獻文獻公有抄寫義子平真自孩時卽茹素便利可喜侍公頤指當意公甚愛之真年十九公出重貲取沙頭王氏女爲妻明年八月十五子時王氏產一女從左

脅下出舉家往視之無不驚愕其脅開縫三月餘始沒尚有丹線一大條久之可驗所產女名曰佛奴慧悟異常面貌端麗方五歲舉動如成人至秋漸不食形體日小一日八月十五子時其母丹線忽開女便躍入母腹卽痛死公命以僧家法焚之築小塔於赤石嶺葬焉平真日夜思念妻女不兩月亦死

文獻公末年雖遷居東帶河上世祠猶在許舍山一日守第人聞祠堂中哭聲甚高明日開戶視之神主前大銅鑪裂爲八塊人以爲不祥至八月廿八日文獻

公無疾而薨

工部侍郎九龍公諱字少蒙文獻公長子生而右手六

指四歲時尙未能言秋日從母張太夫人往東門迴溪莊塗遇老僧忽前抱公曰六指禪師其生于此乎又落富貴劫矣公曰別來安善相對而泣自此能言其敏慧非人所能及公爲姑蘇王寺丞壻多游胥臺虎邱之閒二十八以蘇籍登第甫耆懸車徙于鵝湖西僖里更號西僖居士再修覺林寺時時謝事而游處焉一日在寺見老僧復來而公卒于寺左先祠中

學海類編  
工侍公紹興二年第二名進士有文名嘗主管吏部架  
閣文字除太學錄兼實錄檢討官擢博士改宗正簿  
累官兵部郎官由禮部郎中爲太子詹事兼祕書監  
權工部侍郎以疾致仕

工侍公致仕後徙居鵝湖旣創大第復築名園以其餘  
力改造覺林寺寺傍創文獻公祠堂五楹自爲之記  
鑿石樹祠中記曰覺林在吾西僖吾家爲檀越者百  
年大觀初先文獻公致政歸寺適傾圯廓而新之子  
時爲童子嘗從先公游寺中寺僧輒坐先公銜杯賦

詩畱連忘返者恆數日比余旣冠假寺以讀僧之坐  
我酒我者視昔逾密予若將終身樂焉後釋褐官行  
在所時偷簿書暇過西湖上流憩諸刹恍然覺林舊  
境也然心之悶沈萬萬矣已念吾大人投紱而歸歸  
未數年而先公棄世旣葬僧淵來謁請以其旁院五  
楹奉先公香火卽先公嘗坐而飲者余感其意復出  
金買田三頃畀之俾爲樵燭費時時展拜先像畱與  
僧觴咏翩翩然少年佳思一旦復也恨先公坐臨其  
上不能觴咏如舊日耳閒語淵曰吾再世有德于寺

僧爾寺僧亦奉我先公香火如孫子此誠左右手不可背也願鑿石壁開示我後人無替先公之志俾寺之或毀而不能新也僧或散之四方而不能使復也爾寺僧亦虔祠事世相守無相忘嗟乎一切有爲咸如夢幻夢而覺焉安知覺林之爲色邪空邪余之貪癡乃諄諄于世守淵當戒我曰檀越何久不起矣余以先公之故不能忘情聊爲之銘銘曰茫茫苦海有此覺林釋我吏事來聽梵音不同者道有契者心心之感矣言念昔今在昔先公策杖茲尋今也何之肖

像余臨華燈明滅青篆浮沈庭賓啼鳥簾迤遙岑旣瞻旣拜亦詠亦斟爾賡我醉滌此塵襟笑回遠社知結牙琴願言永世講議彌深我銘末後式也如金

國子公

諱時泰

資稟神異一日十行嘗舉博學宏詞除國

子監主簿不赴志樂幽寂多從高僧道士游常得王八百井中儲丹如璧如月盡食之徧遊名山更名道元號浩光道人歷數年不返人以爲死矣至乾道中年已百餘歲乃一旦還家童顏黑髮無異少年子孫皆亡獨爾曾孫在侍奉又二十年無疾化去化五日



聞棺中呼人名速開之惟有一履一玉冠耳公乃工

侍公從弟也

邑志有傳

閩僧普明喜爲人相葬地文簡公

諱

父雲耕翁卒普明

徧相哭塘山之陽而葬之文簡公廬于墓者三年其始葬方十日月夜見萬燈滿湖叱聲震地文簡公懼興二三僮僕棲隱喬松之下空中問曰此地發福三百年彼人子有何德而畀之速令發去又聞空中高聲應曰尤時亨累世積德表又純孝之子也空中又曰世德純孝可當此地矣其善護之此紹興十四年

秋事也文簡公服闋卽登上第祖孫皆尙書至不肖

玘凡六世而金紫未絕也

邑志詳

文簡公生靖康丁未資質絕人五歲能爲詩句文獻公曰此天上騏驎吾不如也十歲親授以經蔣偕施垌以神童薦于有司年十五以詞賦爲諸士冠毗陵自置郡以來未有舉進士第一人者文簡公二十二歲名冠南宮廷擬狀元因不呈卷秦檜易以王佐時文獻公尙在

文簡公與朱文公同榜俱有文名召除將作監簿虞允

文以史事過三館問孰可爲祕書丞者共以文簡名對取授之張先生栻曰尤君真祕書也及張說入西府公率三館上書倍說補外守台州聲名同前守趙汝愚上得其善政又得其東湖四詩嘉之遂除淮東提舉太上前崩文簡公定號高宗洪邁請易世祖公率顏師魯奏太上親爲徽宗子子爲祖父爲宗失昭穆之序在天之靈不安邁論遂屈卒如公議孝宗嘗與文簡公論人才曰如卿才識近世罕有語宰執曰尤袤甚好前此無一人言何也擢直學士院公薦陸游

不許內禪制用海內士服其博雅

文簡公造就門生最盛卽江南已有十人郡邑後進無不遊公之門如郡邑士胡寶慶鏗李祭酒肅簡公祥蔣狀元文忠公重珍丁寶謨常任皆公陶鑄而成者韓侂胄以應辦賞直轉橫行文簡公奏侂胄四年閒已轉二十七年合轉之官又欲超授四階是朝廷官爵專徇侂胄非磨礪之具也詔遂不行上以疾不省壽皇文簡公上封事千言駕卽日過重華宮都下懽呼中宮謁家廟官吏推賞者一百七十二人文簡口奏

其濫乞大裁節上嘉納汰其半擢公禮部尙書兼侍  
讀陳源姜特立召用人情驚駭公上封事極言二人  
之惡不聽時公年七十遂引年歸又八年薨宋史言  
年七十終于位誤也

文集  
可考

文簡公始任揚州泰興令改江陰學官召爲將作監簿  
大宗正丞進祕書丞兼國史院編修官實錄院檢討  
遷著作郎兼太子侍讀出知台州府除淮東提舉改  
江東召直祕閣遷江西漕兼知台州府召爲敷文閣  
改江東提刑召爲吏部郎官太子侍讀累遷樞密院

正兼左諭德進太常少卿權禮部侍郎兼同修國史  
侍講又兼直學士院中書舍人與祠起知婺州改太  
平州召爲煥章閣待制除給事中兼侍讀擢禮部尙  
書以改政奉大夫致仕贈太師金紫光祿大夫

文簡公致政歸不居許舍山專居東帶河大第數步卽  
出西關渡梁溪因造圃梁溪之上後有高岡眺望沿  
溪左種梅右種海棠各數百樹公有瑞鷓鴣詞二首  
一詠落梅一詠海棠落梅詞云梁溪西畔小橋東落  
葉紛紛水映空五夜客愁花片裏一年春事角聲中

歌殘玉樹人何在舞破山香曲未終卻憶孤山歸醉  
路馬蹄香雪襯東風海棠詞云雨行芳蕊傍溪陰一  
笑嫣然抵萬金烈火照臨光灼灼彤霞射水影沈沈  
曉妝無力胭脂重夜醉方酣酒暈深定自格高難著  
句不應工部總無心

文簡公有詩  
文集五十卷

臨海公

諱

工待公子也娶久不育一日游飲鵝湖中狂

風驟發睹一失風覆舟心甚憐惜懸重賞命漁人往  
拯之乃常熟州倅汪受任滿攜家人入京者貲囊皆失  
幸一家十一口俱獲生全受甚德公出其長女以獻

時女年二十有二矣亦有姿色公厚實其行橐而領  
之又二年而生正平公

諱

汪倅女所產也

正平公好潔雖畜妻妾而不喜近一日閒數盥洗手面  
不茹葷不飲酒稍聞婦女髮油氣嘔吐不已或云終  
身未嘗行人道好焚異香日狎一馴鹿所至隨之書  
室中潔不容一塵公必來自仙位中者乎享年八十  
八卒無子女以太常博士公

諱

次子寺丞公

諱

燿爲嗣

卽玘之高祖也

兵部侍郎五湖公

諱

初生時全體刺百花鳥雀十歲時

學海類編

卷一

萬柳溪邊舊話

七

行詣

隱隱尙存資極慧倦于誦讀以父蔭入仕仕二十年  
至兵部侍郎享高年令終

兵侍公性愛蟹秋風蟹肥日把酒持蟹與客笑傲山陰  
術士袁大韜者其術動帝皇孝宗時時召前席賜賚  
不可勝計大韜挾人主之寵往來三公九卿閒而與  
兵侍公最昵一日訪公里第值公在華藏寺遂操扁  
舟擢湖而來公方與客飲雲海亭上漁人網得八大  
蟹其內有两大綫一觔非復平日所見公甚喜捐錢  
數百文賞之而大韜適至喜而劇飲大韜曰某近遇

一異術能知人食料兵侍公曰今得八蟹一主六客  
孰兼食者大韜嘿坐屈指數十迴筭之血漸赤大叫  
曰異事異事七人俱不得食蟹眾皆大笑大韜復嘿  
筭者久之謂兵侍公曰公五年以內未得食蟹公亦  
大笑未幾客有朱朗卿與弟遂卿者偕去酒方數行  
催庖人治蟹甚急忽遂卿奔來吾兄催蟹啓釜觀之  
睹一落足甚巨取而嘗之頃刻眩倒眾共奔視朗卿  
死矣二三客迎醫治木各司其事至暮遂不能救大  
韜手取諸蟹傾于湖濱偶遺一二落足于岸左一犬

食之立斃而湖濱大小魚之死者不可以數計湖中  
漁舟百十皆仰尤氏爲衣食者乃召進蟹人問之曰  
得于湖岸大垂楊下公命僕夫持鍤掘之得赤首巨  
蛇數十蟹之大者以久餐毒氣也兵侍公甚憐則卿  
厚葬而恤其子弟厚賜大韜數十金終身戒不食蟹  
兵侍公夫人性嚴卞常苦目疾時發時止則往往不食  
海內有名眼藥俱用過不能愈莊定公夫人甚孝其  
姑姑亦大愛之夏日姑目疾大發最劇幾欲自投池  
水中莊定公夫人慟哭禱天刺臂血調藥以進姑目

卽愈歷數十年至大故未嘗復發

事詳夫  
人墓誌

自文獻公首出登第工侍公繼之文簡博士迪功莊定  
科名接武莊定公嘗築圃臨安之西湖花木不繁而  
瀟洒宋度宗游湖上幸其堂御筆題楹閒曰五世三  
登宰輔奕朝累掌絲綸蓋實錄也朝紳榮之

許舍山中井水多鹹苦人飲澗水夏日常患腹疾兵侍  
公夫人曾夢神人撫一鐵柱恍惚如金色泉水湧出  
柱下頃刻數尺因此驚覺以告兵侍公久之歸甯還  
家幃輿中見山閒一柱宛如夢中所睹問女使不見

也命僕夫以松椿識之歸告兵侍公召匠鑿之不十尺而泉水湧出甘淡不異二泉鄉人作地溝分注數十井不竭矣丞相名之曰二二泉而爲之銘銘曰拔劍刺山水爲之湧折腰拜井泉出隨踵精誠所格無有弗應豈以地靈而誠不勝山深井少飲澗痞孕夢神授符濬之泉瑩色清味冽慧泉可夷分注百井汲飲有遺匪世行德神明曷授澤沛萬家來福逾厚泉名二二我豈溢美勒此銘詞千禩毋毀

博士公

諱槩

字與平文簡公次子淳熙二年進士累官建

康府推官擢左朝奉郎太常博士因性閒雅不樂仕宦占仕籍十餘年半在告未壯懸車多方外之游母兄兵侍公極富貴聲色之樂公不一與目自築室于萬竹中晏坐焚香泊如也未耆而歿人共惜之所撰有綠雲寮詩草人比之韋蘇州子二長祕閣公燭次衛尉寺丞燿

迪功公

諱森

字與茂苦志力學甯宗慶元五年年三十九

矣始登進士高第補揚州文學擢迪功郎監潭州南岳廟父知寶慶府致仕在家時年七十獨公一子遂

乞歸養承懽竭力事實慶公者十五年親終服除公亦老矣不復仕宦兄弟中獨公最貧徒富圖書古玩亦享高壽

莊定公

諱

年十九登甯宗嘉定元年鄭自誠榜進士文

簡公登紹興戊辰科嘉定元年亦戊辰科也初授山陽法曹郎令山陽倅海陵參東淮制幕入爲軍器監簿遷太府丞檢詳編修擢司農少卿總餉淮西除理卿出爲福建帥改沿江制副召爲祕書監繼大父爲侍講兼直院出知太平州亦大父舊治也召修史

進侍讀權工部尙書繼大父爲禮部尙書丁父兵侍公憂服除召拜內翰端明殿大學士提舉祕書省提綱史事封毗陵郡侯十年致仕時甫六十有一優游于家者二十四年而後終公少達老閒久歷于世其事行甚多門人趙探花達甫君發感公教育之恩著尤端明日歷十一卷其文淳其事奇鏤板至今盛行于天下故不復贅

文簡莊定二公繼文獻公任三事祿入益厚晉江宗人歲歲來覲皆厚貲以遺之莊定公晚年捐積俸買田



十二頃于晉江以贍族之貧者

事詳晉江人張明誠  
瞻日記事詳閩譜

刺史公

諱煉號  
率齋

學最早十歲通五經十五已閱萬卷矣

善爲古文累舉不第至度宗景定三年始登方山京  
榜進士令山陽不樂吏事告歸薦補州教授召爲祕  
書正字不能佞權要出爲廣德刺史致仕家貧享大  
耄清福二子燾照皆仕不顯而博學有名當是時江  
南郡邑金石文章皆其父子之筆至今石碑布滿諸  
處本邑中更多刺史公年少于莊定而叔行也

祕閣公

諱  
燾

弱冠時讀書于九龍山第五曲愛其中喬松

數十株卽其中結精舍舍後築小閣山林清景咸備  
一日松下忽湧大水橫流數日不止公下視之有眼  
卽命山人穿之深五尺而水泱泱清澈汲以煮茗與  
二泉無異也遂以石甃之自號松泉生公後致仕家  
居亦常居此精舍松益老泉益清公甚樂  
事詳蔣嗣  
梅松泉精  
舍記公旣老有宿疾亦養疾精舍中一日汲泉忽臭味  
達于戶內公甚震驚及夕而泉竭不半年公亡矣朝  
廷每大慶必推恩于大臣文獻文簡祖孫各經推恩  
數次往往力辭然中亦有不能辭者文獻公以上四

代莊定公以下五代無一人不沐朝澤列冠裳

寺丞公

諱耀

太常博士公仲子字仲微生世祿家而好藝

文既長益習經術其業遂爲江南士子心服久不登第及門受經諸生歲以百數公選其最貧者給食次貧者給毫楮士心益向公既嗣爲正平公子更名英年四十始以大父蔭出任仕至衛尉寺丞郎拂衣歸教諸生如故年六十三卒紹定癸巳也生子將作公

諱帶

字公垂資稟最高少與父門下諸名生切磋十年

讀書萬卷性喜爲詩有復初齋詩藁十二卷行世以

伯父莊定公蔭授太常寺大祝擢將作監主簿以詩

忤達者去官生子一卽玘之大父也以玘推恩追封

中憲大夫同簽樞密院事中憲公

諱志

字尙之配郡君

司馬氏生九子不育者七獨先君亞中公

諱交

與叔氏

穎父

諱秀

存先君以玘推恩累進亞中大夫僉太常禮

儀院事配先母魏郡夫人司馬氏生玘穎父公生從

兄良器仕爲提刑點檢子卽天澤也天澤與君同撰

尤譜

終慕公

諱山

字元鎮度宗景定中有名太學素謹厚緘默

有志操晚年堅高尚之節有勸之仕者輒以醇酒醉之私謂家人曰吾家三百年科第十世冠裳宋恩渥矣吾何忍失身二姓乎願肥遁終身耳公與予仕隱雖異跡公眞淳厚君子也

萬柳溪邊舊話跋語

先曾祖大司徒守元公諱圻致仕還架數十木屋於

萬柳溪上日聚親族談先世事著溪邊舊話三卷不

肖實少侍父味菜翁諱君敬翁時述其話洪武二十

九年丙子科實幸登鄉書第四名伯兄務朴公諱文

詔徵孝廉具牢醴率實祭告司徒公墓大會族人于

覺林寺祠屋中求所謂舊話已簡斷墨闕不可讀者

逾半命門人許靈就燈下抄其完者以歸恨全帙之

不得又數年實佐南昌攝郡篆捐俸刊木傳之子孫

馬治類編 三  
曾孫男實拜跋

君子之澤五世先文獻公甫三世而文簡公光大之  
元孫莊定公繼其位源益深流益遠文簡公傳我大  
司徒公中起名位壽富貴一世嘗著舊話三卷曾從  
祖南昌公刻之逾百年而板朽從子都給事中魯重  
梓家塾予男瑛帥廣又刻之憲臺一歲二板俱行傳  
之可久矣嘉靖壬子大司徒公七世孫禮部員外郎  
晉識時年七十有四